

Falta solamente pa firma e documento y permisonan necesario pa

Sunrise Rock Development Group pone e prome piedra november awor na Seroe Colorado

Un Alex Nieuwmeier masha orguyoso a duna di conoce



FOR di basta tempo caba, por a tende cu tin un grupo di inversionista, encabesa p'e conocido hotelero Alex Nieuwmeier di Divi Hotels kier desaroya un resort y golf-course na Seroe Colorado. Awe nan t'asina leu, cu nan ta cla pa cuminsa. E intencion ta pa den curso di otro siman firma cu Gobierno tur e documentonan necesario, mas e permisonan y ainda na november awor pone e prome piedra.

Tur esaki ta tuma lugar den laspo di prome aña di Gobierno aki, pa cual sigur un di e personanan masha orguyoso cu e logro aki ta Minister Otmar Oduber, kende a pone enfasis pa logra e proyecto aki, despues di a keda para pa falta di decision di Gobierno anterior.

Dia di apertura di The Links na 2004, varios personahe di mundo di golf tabata na Aruba, e.o. Parker Smith, Senior Editor di Golf Magazine y Edward Gowan, Executive Director di Arizona Golf Association. Alex Nieuwmeier, General Manager di propiedadnan

Divi na Aruba, ta un fanatico di golf, y fuera di a logra un compleho luhoso cu The Links, a cuminsa pensa riba otro proyecto, cu e kier realisa.

E localidad e biaha aki, pa desaroya un resort di 270 kamper, combina cu un compleho di condominio, ta for di entrada di Seroe Colorado te cu e sero unda un tempo tabata Lago Hospital. E intencion ta pa desaroya aki un golf course di 18 buraco, ofreciendo e golfistanan un otro bista di Aruba, cu nan no conoce.

Esaki ta un soño di Parker Smith y Ed Gowan, dos personahe cu masha influencia den deporte y sigur den golf, kendenan si ta kere cu e proyecto aki na Aruba lo bira algo unico.

E compania pa realisa e proyecto aki, n'e otro banda di Aruba, a bira Sunrise Rock Development Group, for di Pittsburg, PA. Alex Nieuwmeier tabata masha enfatico cu e proyecto aki no mag di stroba aceso pa Baby Beach y tampoco na Boca Grandi, cu ta masha conoci pa practica di kite-surfing.

E resort aki lo construi su pool decknan y tambe un golf course. Lo tin trapi cu bista riba Baby Beach y ta permiti turistanan yega tambe n'e beach aki, pero nunca y hamas ta intencion di tuma e beach aki p'e resort aki exclusivamente, pero ta keda accesible pa publico en general, Alex Nieuwmeier a duna di conoce.

Prome di compromete su mes pa establece e facilidat aki n'e parti aki di Aruba, cu no a ser desaroya manera Palm y Eagle Beach, e compania a laga haci su estudionan ambiental, social y e impacto financiero, pa confirma loke nan ta bisa cu esaki lo bira un proyecto

unico, cu e lo tin su efectonan positivo p'e area y Aruba en general.

E golf course aki ta planea di mantene su flora y fauna actual, Alex Nieuwmeier a duna di conoce.

Por a mira esaki cu realisacion di The Links, unda a mantene e ambiente manera nan a hay'e, cu awe a bira un habitat pa masha hopi parha.

Diseño di e golf course aki lo tuma lugar den e ambiente cu pueblo conoce e sitio aki, y asina lo bira un di e experiencianan pa golf den Caribe, pa no bisa di mundo.

E beneficianan economico p'e area ta obvio. Individuonan cu ta biba na San Nicolas, lo tin un opcion pa haya trabao mas serca di nan cas. E turistanan cu keda aki, lo stimula comercio na San Nicolas.

Di acuerdo cu Alex Nieuwmeier, nan a papia cu miembronan di San Nicolas Business Association y nan tabata masha receptivo pa cu e proyecto aki.

E papel y permisonan necesario ta cla pa ser firma dentro di algun dia y Sunrise Rock Development Group ta spera di haci e ground-breaking ainda na luna di november awor. E comunidad internacional di golf ta masha entusiasma cu realisacion di e proyecto aki. E golf resort di e caliber aki sigur lo atrae huespednan di un cierto bracket di entrada.

Parker Smith y Ed Gowan a reconoze inmediatamente cu Aruba ta riba caminda pa bira un destinacion perfecto pa golf y aki ta hendenan cu sa di kico nan ta papia, asina Alex Nieuwmeier a duna di conoce.

E grupo aki ta sigur cu nan lo sa di mercadea e proyecto aki na un nivel mas halto pa Aruba mes.

